

Trahadonan di Serlimar desapunta

Reunion publico cancela ora a dicidi di pospone cobramento di tarifa te januari



ORANJESTAD - Cobramiento di e tarifa pa Serlimar ta keda posponi pa januari 2019 y e reunion publico di parlamento riba e topico aki a keda cancela. Sindicato SEPPA a presenta pa e reunion, pero a manda trahadonan cas ora a cancela esaki.

Despues cu fraccion di MEP a pidi un reunion publico cu minister di infraestructura y medio ambiente, Otnar Oduber (POR), mirando cu tensionnan tabata halto den comunidad pa introduci un tarifa di Serlimar socialisa, e propio fraccion a cancela esaki mirando cu conseho di minister a dicidi di pospone

introduccion di e tarifa aki te cu januari 2019.

Fondonan

Prome minister, Evelyn Wever-Croes (MEP) a anuncia esaki y cu lo tin un fase transitorio mirando cu lo a introduci esaki pa 1 di juli 2018. E sugerencia aki a bin como primicia di parti di Bon Dia, mirando cu den ley no ta para cu Serlimar ta un monopolio riba nos isla pa loke ta trata recogemento di sushi, cual a conduci e minister encarga pa expresa cu tur hende, no obstante si nan tin un servicio di por ehempel EcoTech, mester paga pa e tarifa di Serlimar.

Sinembargo ora Bon Dia a mostra e minister e echo aki, sr. Oduber a considera di tuma un conseho huridico nobo mirando cu no lo a duna suficiente chens na clientenan di otro compania pa percura pa nan pasa pa e otro servicio y ricibi exoneracion di paga pa tarifa di Serlimar.

Trahadonan di Serlimar a presenta masalmente na parlamento pa asina por a atende e reunion publico mustando asina nan malcontento cu e situacion na Serlimar, y ora e reunion a keda cancela trahadonan a expresa na par di parlamentario di fraccion di MEP cu e 5.4 milyon cu minister Oduber a pidi parlamento 'no ta suficiente'.

Na banda di e fraccion, e punto di e reunion tabata pa asina responsabilisa e minister mirando cu a pidi e 5 milyon extra aki y a haya aprobacion di parlamento mientras alabes a introduci e tarifa socialisa di Serlimar.

Trahadonan kier a tende berdad na reunion

Sindicato SEPPA a expresa prome cu a cancela e reunion cu trahadonan tabatin hopi incertidumbre, specialmente

e manera con ta tende 'cosnan aki aya' cu ta pone nan duda di nan posicion, pues nan a dicidi di atende e reunion pa haya un claridad riba nan preocupacionnan.

Den combersacion cu par di trahado nos a bin ta compromete cu trahadonan si Serlimar tambe ta preocupa pa otro companianan cuminsa haya mas poder den mercado mirando cu nan lo tin plannan grandi pa tuma esaki over, di loke nos a tende di un trahado.

Den augustus lo reporta bek na parlamento

Lider di fraccion di MEP, Rocco Tjon durante un conferencia a splica cu e rason pa kico su persona a yama e reunion ta pa trece claridad riba e discrepancia entre cobra tarifa di Serlimar mientras ya a aloca fondonan adicional ariba presupuesto pa e compania aki.

"Den un carta cu nos a ricibi prome cu e reunion aki lo mester a tuma luga, prome minister a splica cu ademassen augustus gobierno lo bin parlamento pa duna un update riba e placa cu parlamento a aproba y con esaki a

wordo aloca y si tin mester di recurso adicional. Nan lo bay presenta na parlamento alabes e manera cu lo bay cobra e tarifa den 2019."

Den concepto di e fraccion no tin mester di un reunion publico mas, mirando cu tin claridad awo riba kico lo bay pasa. Reaccionando na loke trahadonan di Serlimar a expresa pa loke ta trata nan preocupacionnan, sr. Tjon a declara cu no tabata ningun momento e intencion di bay trata esaki durante e reunion aki.

"Trahadonan a presenta awe pasobra nan lo a tende cu fraccion di MEP lo a bin cu un mocion pa asina haci un cambio den e ley pa faborece otro companianan di procesamiento di sushi, te hasta asina leu cu tabatin trahadonan cu a bisa coleganan di fraccion cu nan no sa dicon nan t'aki."

E lider di fraccion a comenta finalmente cu esey no lo tabata e intencion di e reunion publico y a pidi e mandatario encarga pa dialoga cu sindicato y a duna di conoce cu parlamento ta invita trahadonan.